

漢
輶
紆
程

3417

3417

地800

8676

卸=



光緒丁丑春

滇輶紀程

後學陳寶琛敬題

板蕖宣
南寓齋

滇輶紀程

侯官林則徐少穆



已卯五月廿七日戊午卯考差人員候宣得

旨以

賜徐

充雲

南正考官吳慈鶴副之祝慶蕃充貴州正考官吳振棫副之

俱九叩頭謝 恩畢回寓

六月初八日戊辰晴晨送行者絡繹已刻起程未正抵長新店
小憩又行路窪多潦酉正至良鄉縣城外旅店宿聞行李車
離此二十里停閣難動雇羸往迎四鼓始到

初九日巳巳晴辰刻行巳正到豆腐店與巢松前輩同飯罷行

滇輶紀程

一

過琉璃河熱甚憩一小廟申刻抵涿州穿城行宿南關外旅
店

初十日庚午晴卯刻行巳刻高碑店飯又行三十五里抵定興
縣宿城內行館垣瓦多傾圮

十一日辛未晴子刻行十里渡北河黎明過故城鎮小憩辰刻
抵安肅縣城內行館較大早飯後行二十五里其地爲漕河
有慈航寺方恪敏公督直隸時所重建也相傳恪敏微時嘗
於冬月徒步出關省親雪後過此凍而仆寺僧夢佛爲言門
外仆者乃此閒開府宜迅護之僧如其言扶入而甦焉脩廟

所以報也旁有恪敏勤襄等祠因與巢松在此避午暘觀恪
敏公遺照僧爲設寒具飽啖而行申刻抵保定省城制府以
下皆遣迎於郊以東答之

十二日壬申晴寅刻行辰刻至涇陽驛其地屬滿城縣而距縣
城三十里飯罷卽行午刻至望都縣城內行館巢松前輩昨
日見贈二律今依韻答之又作七律四首寄答李孝廉

綸光

晚飯罷出觀堯母祠陵在祠後有井曰鷄鳴井

十三日癸酉晴子刻行三十里過清風店天尙未明辰刻抵定
州縣城飯罷卽行過明月店見義皇聖里碑午正刻抵新樂

滇輶紀程

二

縣行館在城外自定興至此皆苦旱黍苗出土不及寸望雨
甚切

十四日甲戌晴子刻行刮風涼如深秋寅刻伏城驛飯

四十五里屬正

定午刻抵正定府城宿城內行館旋遊大佛寺其殿三層俯

睨全城銅佛高七丈三尺誠鉅觀也寺內有隋碑郡守陶暹

薌前輩標搨一紙見贈

十五日乙亥晴平明行五里渡滹沱河水甚小過二十里鋪喫
麪巳刻抵欒城縣由城內行住東關外旅店是日因渡河不
能早行僅行六十里實則長如七八十里夜驟雨一陣

十六日丙子晴平明始行因昨夜新雨故也途有行潦自欒城
至趙州四十里多繞道辰正刻飯趙州城內行館自趙州而
南昨夜未雨路亦甚坦行五里過大石橋又十五里憩古廟
口金山寺其外茶亭阮芸臺尙書題句云買絲客去休澆酒
餽餅人來且喫茶申刻抵柏鄉縣穿城行住南關外旅店是
日計行一百里

十七日丁丑晴子正刻行月色如晝卯正至內邱城內行館飯
罷卽行自內邱以南多沙地然遠山疊翠林木蔥茂泉潤草
香道旁有稻田數畝差具南中風致未刻至邢臺縣

順德府城適

滇輶紀程

三

有集場人貨盈積宿南關外旅店計行百二十里

十八日戊寅晴子初刻行黎明至永年縣屬之臨洺關已行七
十里矣行館較精緻飯罷又行過邯鄲觀小憩其地卽盧生
入夢處壁上嵌蓬萊仙境四大字乃呂仙手書又有乩書楹
帖云黃梁富貴本空虛須識箇中人閒適未容長睡去白鶴
神仙工點化無如夢裏客酣恬不肯卽醒來午初刻至邯鄲
縣由城內行宿南關外旅店縣尹呂叔訥

星垣

武進名下士

也與巢松有舊來見於館年已七十由廣文擢大尹現攝斯
邑出示所畫江山萬里圖長卷殊雄勁

十九日己卯子刻卽雨寅初稍晴行凌晨雨甚道泥滯輿人皆委頓午抵磁州宿南關外行館先二十里爲杜邨店自杜邨至城雙渠夾道其清如鏡芰荷出水蘆葦彌岸翛然可賞閱蔣礪堂尙書黔軹紀行集知此渠乃國朝州牧蔣擢疏溢陽河成之至今稻田資其霑漑噫何地不可興利顧司牧奚如耳

二十日庚辰昨夜大雨黎明行天始霽路仍甚滑辰刻渡漳水則陽鳥上升矣漳之旁有銅雀臺故址又纍纍相望者皆曹孟德疑冢也登岸數武卽豐樂鎮屬河南安陽治行館甚敞

滇軹紀程

四

飯罷又行四十里至彰德府城內宿此地多勝蹟如韓魏公晝錦堂之類恨不能悉覽耳

廿一日辛巳晴子初刻行黎明至湯陰縣城謁岳忠武祠其二十三世孫奉祀者出迎以楹帖贈之又過嵇侍中祠扁鵲墓辰刻宜溝驛行館飯其地爲先賢子貢故里今駐以巡檢屬湯陰治又行三十五里過淇水

先數里爲鹿臺鉅橋遺蹟

水流激石作下

灘聲有草橋可徑行過西岸爲高邨店又二十五里抵淇縣城內宿綠筠書院是日計行百三十里而實有百五十里長廿二日壬午晴子刻行黎明過比干墓有孔子書碑至衛輝府

館於城外旅店飯罷又行午刻新鄉縣宿城外旅店計行百
里

廿三日癸未晴子刻行多沙路途遇野狼輿夫哄逐之始卻走
卯刻至亢邨驛屬獲嘉縣有驛丞駐此飯罷行二十里至王
祿集西北風殊大或云黃河盛漲無渡船或云南北岸俱多
深淖不能徒涉眾意皆願止此余與巢松遣人先赴河濶察
聽尙可過去乃復行凡深淖之處輿人裸而舁之行李則募
人運送始抵河之北岸酉刻開舟行風已息而河溜仍甚急
水將平隄歷十二刻於南岸登陸天已薄暮漿澤縣尹遣人

滇輶紀程

五

來迂詢知行館在縣城內蓋岡陵驛之館爲大水所汨故也
又行二十餘里凡涉深淖者八九處甫抵行館漏已再下矣
廿四日甲申晴卯刻行途閒仍多積潦蓋近河州縣皆於月之
中旬連霪大雨故也午刻抵鄭州行館在城外甚精邃有竹
木之勝是日僅行四十里以昨過疲今有勝地且作偃息云
廿五日乙酉晴子刻行平明至郭店驛飯罷又行午刻至新鄭
縣館於城內縣西有具茨山其高處名風后頂又東有大隗
山隗卽隗與風后頂皆以人得名舊志皆以鄭城居溱洧二
水間今考縣志溱水出密縣鷄絡塢入新鄭境卽合於洧今

城南之水卽洧淵而北來未嘗涉溱知城非春秋舊地矣宋王沂公陳文惠歐陽文忠呂文靖墓皆在此明范脩己曲洧新聞載子產廟誤爲祈子之祠張生祠誤爲子皮遂爲皮工奉祀殊可一噓縣志又載有唐開元墓甌殘字乾隆元年出土唐年府君墓志乾隆三十六年出土今未暇訪搨誌以俟考邑又有三賢堂祀子產及裴晉公王沂公申刻飯罷又行渡洧水乘小舟輿馬皆徑涉岸上有子產乘輿濟人處碑亥刻至長葛縣屬之石固鎮宿是日計行百四十里

廿六日丙戌晴平明行五十五里渡潁水飯於潁橋行館襄城縣轄

滇輶紀程

六

其地有潁濱書院是日甚熱飯後暫息數時申刻又行晡時抵襄城縣穿城行至南關外過石橋乃汝潁合流處宿於橋南旅店予衣箱落水浸溼漏夜開曬

廿七日丁亥丑刻巢松先行時已微雨晨起尙未息予將行李草草部署早飯罷始就道道旁有黃城山其下卽沮溺耦耕處申刻過遵化店渡沙河其上有子路問津處碑至葉縣城內行館則巢松已赴保安驛矣飯後予亦前進路甚泥濘蓋今晨之雨南來愈大也十里有丈人止子路宿處碑渡滄河至舊縣行館漏已再下因宿焉此地有昆陽雄風坊卽光武

破王尋處

廿八日戊子平明行三十里至保安驛行館飯仍葉縣境有裕
葉巡檢駐此飯後又行三十里爲扳倒井相傳光武駐師於
此土渴甚扳石得泉後因成井今井中泉源甚盛且瀉爲兩
池皆種白蓮後有光武祠壁間繪雲臺二十八將象奉香火
者爲克敬道人居此五十年矣其別院曰玉照堂有荷池一
方旁多蒔卉予到此甚願留憩見黑雲如墨亟須就道甫二
里則大雨如注沿途輿人多蹶予亦爲箕之簸揚矣酉刻抵

裕州北關外行館甚敞巢松在此相俟

裕卽古方城之地

滇輶紀程

七

廿九日己丑辰刻行道旁有張廷尉祠墓三十里許渡趙河於
岸上行館小坐未刻冒雨行申刻宿博望驛卽漢張騫采地
二十日庚寅寅刻冒雨行三十里至新店天晴飯罷又行至南
陽府離城八里之粟河店宿此地行館本在城內近因夏閒
河水常發往來非易故每館於此明日卽由此前進不經府
城矣

六月初一日辛卯晴子初刻行平明林水驛飯未刻過新野縣
館於南關外

初二日壬辰晴子刻行渡白河換船兩次白河卽清水發源嵩

山雙鷄嶺西南入漢河上有望夫石平明新店鋪飯辰刻憩
呂堰驛入湖北襄陽境下午又行渡小青河晚抵樊城卽仲
山甫封地宿於旅店自京都至此已行二千三百九十五里
矣宋將王順牛天富拒元兵在此地今城已無存

初三日癸巳晴在樊城檢行李

初四日甲午晴候夫馬未齊再住一日聞漢江老龍隄漫口府
縣皆在彼防護

初五日乙未晴平明濟漢由襄陽城外行城南有峴山祠羊杜
二公墮淚碑在焉峴之南爲鹿門山龐德公孟浩然皆隱此

滇輶紀程

東爲習家池舊址晉山簡所遊者今名北馬泉西北方山之
麓爲漢皋卽鄭交甫遇二女解珮處是日多沿漢行六十里
渡小河飯宜城又三十里至宜城縣城內宿城之東北二十
里有宋玉墓城東有杜康臺爲康造酒處此地舊出美酒張
華輕薄篇所謂宜城九醒也

初六日丙申晴子刻行平明新店飯仍宜城渡小鹽河已刻至鍾
祥之麗陽驛宿是日行九十里實只七八十里耳

初七日丁酉晴亥刻卽行二十里過斑竹岡唐韓翃送人赴江
陵詩云斑竹岡連山雨暗枇杷門向楚天秋卽此又四十里

石橋驛飯屬荆門州時天尙未明又行四十里至子陵鋪相傳嚴

子陵曾僑寓於此州東北巖山上有客星井亦其迹也又二十里宿荆門州城內之考棚下午微雨是日多山路

初八日戊戌晴子刻行二十里過掇刀鋪相傳 關聖屯兵此地插青龍刀於石罅今 關帝祠內有小石建大刀其中時昏夜未得觀復有馬跑泉遺趾又二十里團林鋪飯六十里宿建陽驛其地以建陽河得名仍荆門州治

初九日巳亥晴以昨晚旅店湫隘熱不可耐定更後卽行丑刻四方鋪飯卯刻至荊州府城史記楚文王熊貲始都郢卽此

滇輶紀程

九

有仲宣樓庾亮南樓馬融絳帳臺孟嘉落帽臺宋玉羅合宅諸遺趾南門外有息壤其土握去復生相傳繇所以湮洪水者今握多尙致水潦聞江水猝發官道盡沒舟行爲梗因定計乘舟未刻赴舟次舟殊窄俗名倒爬下午大風不能開在江邊暫泊

初十日庚子晴巳刻風定解纜行東南風利三十里至虎渡口俗名太平口江面較小過此則皆下水矣晡時過李家口

公安

縣亥刻至黃金口泊計行九十里

十一日辛丑晴辰刻發午過沱孔蓋自公安達湖南皆泛沱水

江之別支也申刻過四水口入湖南澧州界漏夜行四鼓泊
津市距澧州二十里餘是日計行一百八十里

十二日壬寅晴開舟以上水行較遲緩巳刻至澧州距城二里
許卸舟館於城內試院州治有車武子聚螢臺及陸宣公墓
遺迹閱州志知自虎渡口至州水道乃明張江陵開濬以殺
荆流者是日熱甚下午雷雨數陣

十三日癸卯晴未刻就道渡湖舟者三戌刻宿清化驛

十四日甲辰晴丑刻行平明過鼇山鋪辰刻抵大龍驛

有大龍山故名

滇輶紀程

十

十五日乙巳晴子刻行平明已抵常德府館於城外常德卽隋
朗州城外十五里有善德山以善卷避堯讓天下於此故名

十六日丙午晴子刻行丑刻過陬市

又作周溪屬桃源縣

人居市肆亦極

整密過小渡三處皆以舟爲梁辰刻至桃源縣行館在河濤
因緬甸貢象入境邑令恐前途驛舍不敷勸余併兩程行申
刻飯罷又行過卽山路俯臨大谿勢險而窄經桃洞卽秦人
避地處以昏黑未得觀聞有劉夢得書桃源佳致四字渡白
馬水西辰谿三水亥刻至鄭家驛宿是日計行百二十里

十七日丁未晴天涼如秋平明行巳刻次新店驛仍桃源轄是

日轎始加緯

十八日戊申晴寅刻發平明已二十五里入沅陵縣界已刻過辰龍岡山勢環抱疑若無路次界亭驛

十九日巳酉晴寅刻行平明過馬鞍塘遇緬甸貢象過此又過獅子塘及來溪石橋已刻至馬底驛宿驛在馬鞍山之麓故以命名是日山路陡甚

二十日庚戌寅刻行山路多險已刻至辰陽驛在驛館小坐雲南伴送貢象之員亦於是日到此行館逼狹邑令張時菴鴻箴勸余入城住其署中遂渡沅入辰州府城於縣署之後堂

滇輶紀程

十一

下榻此地有小西山在城西北古藏書之所也

廿一日辛亥張明府留住一日意誼甚殷以紙索書余作七律二首書扇贈之又撰書楹帖一聯云一縣好山留客住五谿秋水爲君清是晚雷雨大作滂沱達旦此地已旱四十餘日得此喜雨交相慶也

廿二日壬子張明府又留一日以滇省貢使亦過此夫馬不足故也午後又大雨書聯箋數事

廿三日癸丑平明行張明府渡河送於郊未刻至船谿驛仍沅陵轄是日皆山路七十里遠如百里抵驛後有雷雨一陣

廿四日甲寅寅刻行四十里過辰溪縣其地無城飯後渡溪行三十里至山塘驛宿是日山多路長天氣陰晴各半

廿五日乙卯寅刻行四十里至中和鋪憩留雲寺又四十里宿芷江縣之懷化驛宋史地理志有懷化鋪卽其地也是日所過諸山俱峻絕木旗嶺雲氣尤變幻八十里地遠如百里晡時雨

廿六日丙辰晴寅刻行平明過榆樹灣市肆甚密謁天后宮憩楊公廟楊公宋時人蓋神於沅水者巳刻抵羅舊驛俗名馬公平以山路到此忽平坦也羅舊在公平南二十里本有

滇輶紀程

三

驛舍嗣因去懷化過遠而府城又太近故移驛於馬公平而仍其羅舊之名驛有王陽明先生碑刻詩云客行日日萬峯頭山水南來亦勝遊布穀烏啼林雨暗刺桐花暝石谿幽巒煙喜過青楊瘴鄉思愁經芳杜洲身到夜郎天萬里五雲西北望神州

廿七日丁巳寅刻行巳刻至沅州府城行館在城內甚清邃郡

守藍凡石

嘉績

率代理芷江令李參軍縣尉蔣賓隅

寅

來迎

侯凡石年七十餘浙之定海人乃乾隆乙酉鄉科巳丑中書迄今二十六科宦途中鮮有其匹賓隅亦戊申賢書以作宰

星誤左遷縣尉今已十餘年矣余作沅兩君歌贈凡石賓隅
廿八日戊午寅刻行過橋橋兩旁皆列肆三十里冷水塘小坐
自冷水以南又皆山路過小栗大栗二嶺遇雨即晴又過迴
龍閣瀕河狹路險甚已刻抵便水驛宋史地理志崇甯三年
以獎州地爲便谿砦即此也行館即在巡檢署中

廿九日巳未晴寅刻行渡沅水又過蜈蚣嶺已刻至晃州此地
舊屬芷江縣以苗民不願嘗赴京呈請改歸黔省於丁丑年
特設直隸通判以便之予至此見學宮考棚尙未落成聞苗
民復在京呈改 特派督撫會勘行且至矣考晃州以晃山

滇輶紀程

十三

得名宋淳熙紀年酋長田漢權以砂井人粟忠所獲晃州古
印一紐來獻遂以漢權爲晃州刺史

三十日庚申晴寅刻行渡沅三十里至鮎魚鋪入貴州界又三
十里至屏縣行館在城內此地亢旱月餘田禾槁者十之七
八是日熱甚向聞雲貴夏不葛冬不裘恐未盡然

七月初一日辛酉晴寅刻行五十里至清谿縣路坦而近渡清
浪水入城館於縣署蓋此地無驛舍也

初二日壬戌晴寅初刻行五十里至焦谿過河飯又四十里宿
定遠縣是日路甚險惡上接千仞下臨重淵聞雨後水發光

不可行茲以遇晴爲幸然此地苦旱久矣身雖行役亦甚爲
盼澤也府城有中河山兩水夾流山居其中石壁鐫有楚橋
風順四字又有香鑪山上豐下削巖上鏤泝流光三字府治
倚山爲城山隙處補以睥睨望之若無城然府前大石橋臨
鎮陽江江卽濩溪合西來諸水入沅由此泛舟下水可直達
常德是日始見苗民

初三日癸亥晴寅刻行平明過文德關關側有石五竅竅中出
泉名雲根五漏泉又十里經相見坡三重迭起每陟一坡則
兩坡皆見行人相去數里若覲面然辰刻劉家莊飯又行經

滇輶紀程

十四

華嚴洞輿恩恩昇過以未得觀爲憾又過望城坡距施秉縣
十里而全城在望坡南兩山夾澗俗傳諸葛武侯鑿以運糧
者明黔撫郭子章開之復塞 國初洪承疇謂開此洞可舟
運至偏橋以達黃平役千人鑿之不通而止諺曰若要此洞
開除非諸葛來蓋山削水急每爲崩石壅斷故也午刻抵施
秉縣宿縣北有巴施山南有秉谿故名

初四日甲子寅刻行遇雨巳刻處暑三十里濫橋塘飯又十里
將至東坡塘有飛雲巖天然奇秀真如金枝玉葉輪囷蔥鬱
上有大士立象左右皆流泉四時不竭由兩方池瀉出歷溪

橋而下山中終日泠泠有聲巖下一洞雖小亦覺奇古西有數百年古柏而西南有月潭寺王文成公碑記在焉到此小憩又行二十里抵黃平州館於城內聞城東四十里有架梁山孤峯插天可望千里城北三十里有北攸河原名都凹水卽濼江之源

初五日乙丑平明行天陰微雨三十里重安江飯仍黃平州轄飯後過渡午過大風洞至清平縣由北城出南關外宿夜雨有寒意

初六日丙寅雨甚涼平明行四十里飯楊老驛又四十里過魚

滇輶紀程

五

梁江四面石壁如削嵐翠滴瀝中巨石橋泉琤琮過橋下亦名響琴峽岸旁小寺有閣三重值雨景尤佳絕過峽爲黃花嶺又十里宿酉陽驛自楊老至此皆平越州治距州城三十里

初七日丁卯平明雨歇行五十里次貴定縣

初八日戊辰晴卯刻行十五里經牟珠洞俗名母猪洞明太史邱禾實易名憑虛 國朝鎮遠守陳受漣易今名山門額曰天然古洞初入尙有容光謂之天窗中間矗立自然石柱高十餘丈層級分明僧人奉佛於此再進則須然炬見石乳垂

垂如筓異狀百出曰童子拜觀音曰七層寶塔曰蓮花座曰鐘曰木魚叩之音各相類曰石象石尊曰千人座曰十八羅漢無不宛肖地下白石如梅曰落地梅花瓣過此路益仄而滑難以更進矣聞洞之西復有兩洞皆相通未及悉觀又十五里新安飯仍貴州轄過銀錠關又三十里次龍里縣縣在元爲龍里州以城南有龍駕山得名聞其山有留雲洞洞中石乳二叩之若鐘鼓聲何黔山之多奇也夜雨

初九日巳巳晴卯刻行三十里谷腳小坐又行過龍洞坡午至貴州省城

滇輶紀程

十六

初十日庚午辰刻行黔中當事俱遣送過湯粳嶺飯龍場驛仍貴筑轄明王文成公曾謫此地驛丞飯後又行遇大雨午至清鎮縣城內住

十一日辛未晴卯刻行在蘆荻塘飯次安平縣自昨日過龍場後山皆迤邐路較坦易是日午後天氣亦暄暖

十二日壬申晴卯刻行三十里過飯籠鋪飯於白板房又五十里至安順府與巢松宿城內旅店緣行館留待制軍耳

十三日癸酉晴雨相閒雲貴制府伯協揆今日住鎮甯州恐行館未能騰出因在此暫住一日

十四日甲戌雨晨起飯罷行三十里馬場塘遇伯協揆入都祝
嘏過此班荆小坐而別又三十里鎮甯州城內宿

十五日乙亥晴晨起飯罷行十五里過安莊坡又十五里繁花
鋪過白水橋有瀑布橫亘十餘丈又過羅伽坡迴龍坡路俱
險惡未刻至坡貢宿

十六日丙子晴早晨飯罷行過鳳凰關石龍關俱陡削三十里
至安樂鋪路稍平午至朗岱是處苗民別出數種衣飾各殊
道旁桂花正開折數枝供之小瓶

十七日丁丑晴晨飯罷行十五里過打鐵關又十里拉邦坡十

滇輶紀程

五里那當坡俱甚陡險下臨無地自昨日鳳凰關以西皆登
多而降少至此則上少而下多拉邦直下十里那當十五里
中下坡者居四之三又渡毛口河河水如渥赭亦名西林渡
後過二小坡宿阿都田爲興義府南安縣轄距城九十里
十八日戊寅陰卯刻飯後行厯山坡十餘處至花貢遇雨過老
鷹崖直上十五里黔山之峻無出其右者次白沙驛普安縣
轄距城六十里雨後天氣嫩寒如初冬

十九日己卯晨起飯罷行遇雨路甚泥濘幸無峻險處二十里
罐子窰李家旅店小坐又十八里至上寨行館半將傾圮與

巢松前輩於一屋內聯牀而寢

二十日庚辰卯刻飯行沿溪傍山路窄泥滑過庚戌橋乃雍正八年鄂西林相國所建逾南鯨坡頗峻然視前數日則剝施矣三十里至楊松道旁桂花盛開以多雨其香少減又三十里次劉官屯遇雨

仍普安廳轄

至夜分始息

廿一日辛巳陰晴相閒卯刻飯行途多怪石泥又滑幸雨已歇輿人雖蹶尙無甚苦七十里至亦資孔本名亦是孔以路形似亦字也武弁來迓是日風勁如北地之九十月

廿二日壬午晴卯刻飯行三十五里入滇省界有滇南勝境木

滇輶紀程

六

坊右爲關聖廟左爲石虬亭有石蜿蜒地中如虬形小坐又行十五里至平彝城內住縣署自入滇境輿後加用監臨封條吏送科場事宜冊

廿三日癸未晴卯刻飯行西風大官道以積雨故爲水所沒繞道由山麓行山皆迤邐土色如赭三十里棠梨灣小坐又三十里至白水驛宿屬南甯縣距城七十里

廿四日甲申晴卯刻飯行西風大過分水嶺不甚峻四十五里至霑益州城內巢松待余於逆旅湫隘喧雜實不可住因移榻於州署是日巢松前輩生日

廿五日乙酉晴卯刻飯行三十里至三又路南甯縣轄又四十
五里至馬龍州下榻於州署之西偏

廿六日丙戌晴卯刻行五十五里板橋鋪二十八里逾關索嶺
不甚峻宿易隆驛仍尋甸州轄夜雨達旦

廿七日丁亥晨起雨歇飯行三十里又雨有一水可十餘里眾
山環之名嵩明海一山突出水濤萬松森立道旁一碑曰小
蓬萊有寺曰海潮適大雨如注未得登眺爲憾雨後山泉陡
落如黃龍蜿蜒百道疾走四望山色明秀水田千頃甚愜幽
賞又三十里至楊林驛宿乃嵩明州轄距州治三十里省中

滇輶紀程

十九

遣巡捕來省垣諸公皆以柬來

廿八日戊子晴卯刻飯行路坦而近六十里至板橋驛宿

廿九日己丑晴以向例皆於八月朔進省仍在板橋住一日遣
巡捕官先入城持柬答撫軍司道書扇十柄

八月朔日庚寅晴卯刻行二十里高坡塘有亭立銅牛一又十
里過金馬山相傳阿育王季子至德呼馬於此又名呼馬山
漢王褒所祭或卽其地今有金馬祠省中以鹵簿鼓吹來迎
撫軍司道皆遣迓昆明莊明府親迓於郊弗敢見去城二里
有太平橋古名贍輶橋相傳爲諸葛武侯建入麗正門城甚

宏壯城中舉袂成雲視黔省數倍過五華山麓五華書院在
焉鄂西林相國所建也使館在五華山右九龍池之上俗名
菜海古稱柳營乃沐氏別業館有兩院與巢松前輩分住